

l'auoient bien offensée; mais auffi qu'elle auoit fasché Dieu, & qu'à la mesme mesure qu'elle mesurerait ses ennemis Dieu la mesurerait, qu'elle trouuerait le pardon si elle pardonnoit, & la vengeance si elle se vengeoit. Cette pauvre femme ne repartit autre chose, sinon ie ne leur feray donc point de mal.

En ce mesme temps le Pere demandant par rencontre à vne autre femme si [76] elle ayroit Nostre Seigneur, cette femme qui est d'un naturel extrêmement vindicatif, & qui autre-fois estoit comme enragée contre les Iroquois, respondit d'un bon accent: L'ayme Dieu plus que ie ne haï les Iroquois: c'est ce seul amour que ie luy porte qui n'empesche de leur faire ressentir les torts qu'ils m'ont faits. Je suis restée seule d'une grosse famille, ie suis pauvre & abandonné, ils m'ont mis en cet estat, ayant rosty & mangé tous mes parens & tous mes amys, en effet, mon cœur veut hayr ces gens-là, disoit-elle; mais il a plus d'amour pour Dieu qu'il n'a de hayne & d'auerfion pour eux: c'est pourquoy ie ne leur veus aucun mal, r'entrons s'il vous plaist en discours.

Le second iour apres l'arriuée de ces prisonniers, Monsieur le Gouverneur se transportant à la residence de S. Ioseph bien accompagné, entra dans nostre petite maison, où se trouuerent auffi les vainqueurs, les vaincus & les autres Sauvages. Dieskareth parla en cette forte; c'est à vous à qui i'adresse ma parole, vous qui n'estes qu'une mesme chose, vous qui n'avez [77] qu'un mesme secret, vous qui vous vous parlez à l'oreille: C'est au Capitaine des François, c'est à vous qui depuis trois ans estes deuenus François, c'est à toy Negabamat, c'est à toy Etinechkaouat, à qui i'adresse ma voix, vous n'estes qu'un mesme conseil,